



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË DHËNAVE PERSONALE DREJTORIA E PËRGJITHSHME PËR TË DREJTËN E INFORMIMIT DREJTORIA E VLERËSIMIT TË ANKESAVE

Nr. 222/5 prot.

Tiranë, më 10.03.2026

VENDIM

Nr. 11, datë 10.03.2026

PËR URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, nenit 9/1, pikës 3 dhe 5 të nenit 24, të ligjit nr. 119/2014 “Për të drejtën e informimit”, i ndryshuar,

KONSTATOVA SE:

Ankuesi z. (në vijim “ankuesi”), ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim “Komisioneri”) formularin e ankesës me nr. 222 prot., datë 20.01.2026, me objekt “*Ankim ndaj refuzimit për dhënie informacioni dhe kopje të dokumenteve zyrtare*”, kundër Autoritetit Publik/Korporata e Investimeve Shqiptare sh.a. (në vijim “Autoriteti Publik”).

Ankuesi, me anë të kërkesës së datës 26.12.2025, depozituar në adresën elektronike grei.flamuraj@aicorporation.al, saktësuar nëpërmjet e-mail-it të datës 26.01.2026, ka kërkuar t’i vendoset në dispozicion informacioni/dokumentacioni, në lidhje me:

- 1. Një kopje të vendimit të emërimit të çdo C.E.O. të Korporatës së Investimeve duke përfshirë këtu të gjithë C.E.O. të angazhuar nga data e themelimit dhe funksionimit të Korporatës;*
- 2. Një kopje të kontratës së punësimit të C.E.O. të Korporatës së Investimeve, duke përfshirë këtu të gjithë C.E.O. të angazhuar nga data e themelimit dhe funksionimit të Korporatës, me të dhëna personale në kontratë të redaktuara sipas parashikimeve të Ligjit për mbrojtjen e të dhënave personale;*
- 3. Një kopje të gjithë listë-pagesave mujore me përfitimet e rrogës së çdo C.E.O. të Korporatës së Investimeve nga data e themelimit të saj si dhe çdo pagesë tjetër të përdituar në formë bonusi apo diete shërbimi;*
- 4. Një listë emërore të personave të angazhuar si Anëtarë të Keshillit të Mbikqyrjes së Korporatës së Investimeve nga data e themelimit të saj;*

5. Një kopje të vendimit të emërimit të çdo Anëtari të Këshillit të Mbikqyrjes të Korporatës së Invesimeve, nga data e themelimit dhe funksionimit të Korporatës;
6. Një kopje të kontratës së angazhimit të çdo Anëtari të Këshillit të Mbikqyrjes të Korporatës së Invesimeve, nga data e themelimit dhe funksionimit të Korporatës, me të dhënat personale në kontratë të redaktuara sipas parashikimeve të Ligjit për mbrojtjen e të dhënave personale;
7. Një kopje të gjithë listë-pagesave mujore me përfitimet e rrogës të çdo Anëtari të Këshillit të Mbikqyrjes të Korporatës së Investimeve, nga data e themelimit dhe funksionimit të Korporatës si dhe çdo pagesë tjetër të përdituar në formë bonusi apo diete shërbimi;
8. Një liste emërore të personave të angazhuar si Anëtarë Bordit Këshillimor të Korporatës së Investimeve nga data e themelimit të saj;
9. Një kopje të vendimit të emërimit të çdo Anëtari të Bordit Këshillimor të Korporatës së Invesimeve, nga data e themelimit dhe funksionimit të Korporatës;
10. Një kopje të kontratës së angazhimit të çdo Anëtari të Bordit Këshillimor të Korporatës së Invesimeve, nga data e themelimit dhe funksionimit të Korporatës, me të dhënat personale në kontratë të redaktuara sipas parashikimeve të Ligjit për mbrojtjen e të dhënave personale;
11. Një kopje të gjithë listë-pagesave mujore me përfitimet e rrogës të çdo Anëtari të Bordit Këshillimor të Korporatës së Invesimeve, nga data e themelimit dhe funksionimit të Korporatës si dhe çdo pagesë tjetër të përditësuar në formë bonusi apo diete shërbimi.

Në mungesë të një përgjigje nga Autoriteti Publik, ankuesi, me pretendimin se është cenuar në të drejtën për informim, ka paraqitur ankim pranë Komisionerit duke i kërkuar ushtrimin e kompetencave që i njej ligji, konkretisht, urdhërimin e Autoritetit Publik për dhënien e dokumentacionit të kërkuar sipas kërkesës për informacion datë 26.12.2025.

Komisioneri, pas shqyrtimit paraprak të ankesës, bazës ligjore dhe rrethanave të faktit të paraqitura në të, vlerësoi se ankesa përmbush kriteret formale ligjore, të përcaktuara në nenin 24 të ligjit nr. 119/2014 “Për të drejtën e informimit”, i ndryshuar (në vijim “LDI”).

Në përputhje me nenin 10 të ligjit nr. 44/2015 “Kodi i Procedurave Administrative i Republikës së Shqipërisë”, i cili parashikon: “Organi publik siguron që të gjitha palët dhe persona të tjerë të përfshirë në procedurë të jenë në gjendje të ndjekin dhe të mbrojnë të drejtat dhe interesat e tyre ligjorë në mënyrë sa më efektive dhe të lehtë të jetë e mundur”, Komisioneri nëpërmjet shkresës nr. 222/1 prot., datë 26.01.2026, ka kërkuar nga Autoriteti Publik të informohet mbi trajtimin, apo procedurën e ndjekur, lidhur me kërkesat për informacion, si dhe sqarime për disponimin e dokumentacionit të kërkuar.

Në vijim të shkresës së sipërcituar, Autoriteti Publik, nëpërmjet shkresës nr. 8/4 prot., datë 03.02.2026 regjistruar pranë Zyrës së Komisionerit me nr. 222/2 prot., datë 03.02.2026, i ka kthyer përgjigje ankuesit dhe Zyrës së Komisionerit, duke i vendosur në dispozicion një pjesë të informacionit/dokumentacionit të kërkuar.

Ankuesi ka vijuar ankimin e tij nëpërmjet e-mail-it të datës 04.02.2026, regjistruar pranë Zyrës së Komisionerit me nr. 222/3 prot., datë 04.02.2026 dhe e-mail-it të datës 02.03.2026, regjistruar pranë Zyrës së komisionerit me nr. 222/4 prot., datë 03.03.2026, duke vijuar përkatësisht për: “1. Një kopje të vendimit të emërimit të çdo C.E.O. të Korporatës së Investimeve duke përfshirë këtu të gjithë C.E.O. të angazhuar nga data e themelimit dhe funksionimit të Korporatës; 2. Një kopje të kontratës së punësimit të C.E.O. të Korporatës së Investimeve, duke përfshirë këtu të gjithë C.E.O. të angazhuar nga data e themelimit dhe funksionimit të Korporatës, me të dhëna personale në kontratë të redaktuara sipas parashikimeve të Ligjit për mbrojtjen e të dhënave personale;”, të cilat janë pika 1 dhe 2 e kërkesës së datës 26.01.2026, pasi për pikat e tjera ka marrë përgjigje nëpërmjet vendimit nr. 07, datë 24.02.2026, të Zyrës së Komisionerit për të Drejtën e Informimit dhe Mbrojtjen e të Dhënave Personale ndaj të njëjtit Autoritet Publik.

Në këto rrethana, pas shqyrtimit të objektit të ankimit si dhe konsultimit të legjislacionit përkatës, Komisioneri vlerëson se, informacioni i kërkuar përmbush kërkesat e pikës 2, të nenit 2 të LDI, sipas të cilit “informacion publik” konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik”.

Rrjedhimisht, ekzistenca e informacionit/dokumentacionit të mësipërm pavarësisht nëse ai është i prodhuar apo administrohet nga Autoriteti Publik, ngarkon me përgjegjësi këtë të fundit, për vënien në dispozicion të informacionit/dokumentacionit të kërkuar.

Autoriteti Publik, për vënien në dispozicion të informacionit/dokumentacionit të kërkuar, duhet të mbajë në konsideratë parashikimin sipas pikës 6 të nenit 17 të LDI, ku përcaktohet se: “Nëse kufizimi prek vetëm një pjesë të informacionit të kërkuar, pjesa tjetër nuk i refuzohet kërkuarit. Autoriteti Publik tregon qartë pjesët e dokumentacionit përkatës që janë refuzuar, si dhe në bazë të cilës pikë të këtij neni është bërë ky refuzim”.

Bazuar në shkronjën “a” të pikës 1 të nenit 2 të LDI parashikohet se: “Autoritet publik” është çdo organ administrativ i parashikuar në legjislacionin në fuqi për procedurat administrative, organet ligjvënëse, gjyqësore dhe ato të prokurorisë së çdo niveli, organet e njësisive të qeverisjes vendore të çdo niveli, organet shtetërore dhe entet publike, të krijuara me Kushtetutë ose me ligj”.

Në kuptim të këtij parashikimi, Korporata e Investimeve Shqiptare sh.a. është Autoritet Publik dhe subjekt i LDI, për rrjedhojë detyrohet për zbatimin e tij, duke garantuar njohjen e publikut me informacion në kuadër të transparencës.

Për të mundësuar realizimin e objektit dhe qëllimit të tij, LDI, në pikën 1 të nenit 1 përcakton se: “1. Ky ligj rregullon të drejtën e njohjes me informacionin që prodhohet ose mbahet nga autoritetet publike. Në këtë kuptim, çdo autoritet publik pavarësisht nëse është në cilësinë e “prodhuesit” apo “mbajtësit” të informacionit, detyrohet të garantojë njohjen e publikut me informacion, në kuadër të ushtrimit të të drejtave dhe lirive të individit në praktikë, si dhe të formimit të pikëpamjeve për gjendjen e shtetit dhe të shoqërisë.

Si përfundim, Komisioneri thekson se, LDI ka për qëllim të nxisë përforcimin e integritetit, të transparencës e të përgjegjshmërisë së Autoriteteve Publike.

Bazuar në pikën 3, të nenit 3 të LDI, “Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit”.

Zyra e Komisionerit vëren se informacioni/dokumentacioni i kërkuar nga ankuesi, lidhet me përdorimin nga ana e Autoritetit Publik, të fondeve të garantuara nga buxheti i shtetit.

Gjithashtu, ankuesi është gazetar, i cili synon informimin e opinionit publik mbi çështje lidhur me funksionimin e autoriteteve publike, duke i shërbyer në këtë mënyrë interesit të lartë publik. Ky qëndrim i Komisionerit, gjen mbështetje në jurisprudencën e GJEDNJ-së, e cila në çështjen “*Társaság a Szabadságjogokért kundër Hungarisé*”, vlerësoi se, pengesat e krijuara, të cilat vështirësojnë aksesin në informacion me interes publik, mund të dekurajojnë punonjësit e medias, ose në fusha të ndërlidhura me të, të realizojnë punën e “*mbikëqyrësit shoqëror*”, duke zvogëluar mundësitë e tyre për të ofruar informacione të sakta dhe të besueshme.

E drejta për informim është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

PËR KËTO ARSYE

Bazuar në shkronjat b) dhe ç) të pikës 5 të nenit 24, nenit 25 të ligjit nr. 119/2014 “Për të drejtën e informimit”, i ndryshuar, shkronjën a) të pikës 1 të nenit 18 të ligjit nr. 49/2012 “Për organizimin dhe funksionimin e gjykatave administrative dhe gjykimin e mosmarrëveshjeve administrative”, i ndryshuar,

V E N D O S A:

1. Pranimin e ankesës së z. _____, me nr. 222 prot., datë 20.01.2026, vijuar nëpërmjet e-mail-it të datës 04.02.2026, regjistruar pranë Zyrës së Komisionerit me nr. 222/3 prot., datë 04.02.2026 dhe e-mail-it të datës 02.03.2026, regjistruar pranë Zyrës së komisionerit me nr. 222/4 prot., datë 03.03.2026, ndaj Autoritetit Publik, Korporata e Investimeve Shqiptare sh.a. me objekt “*Ankim ndaj refuzimit për dhënie të informacionit dhe kopje të dokumenteve zyrtare*”.
2. Urdhërimin e Autoritetit Publik, për vënien në dispozicion të informacionit/dokumentacionit sipas kërkesës për informacion datë 26.01.2026, konkretisht: “1. Një kopje të vendimit të emërimit të çdo C.E.O. të Korporatës së Investimeve duke përfshirë këtu të gjithë C.E.O. të angazhuar nga data e themelimit dhe funksionimit të Korporatës; 2. Një kopje të kontratës së punësimit të C.E.O. të Korporatës së Investimeve, duke përfshirë këtu të gjithë C.E.O. të angazhuar nga data e themelimit dhe funksionimit të Korporatës, me të dhëna personale në kontratë të

redaktuara sipas parashikimeve të Ligjit për mbrojtjen e të dhënave personale.”, brenda datës 24.03.2026, në përputhje me parashikimet e pikës 6/1 të nenit 24 të ligjit nr. 119/2014 “Për të Drejtën e Informimit”, i ndryshuar.

3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijani, sipas nenit 25 të ligjit nr. 119/2014 “Për të drejtën e informimit”, i ndryshuar.
4. Ky vendim u shpall sot në datë 10.03.2026.

KOMISIONERI

Besnik Dervishi